



VINCENT KWOK SHIH KANG (kiri) menyerahkan replika cek bantuan untuk Yayasan Inisiatif Penyelidikan Kanser kepada Dr. Tea Soo Hwang (kanan) sambil disaksikan oleh Muhammad Ibrahim di Kuala Lumpur, baru-baru ini.

LIAM salur RM50,000 bantu Yayasan Inisiatif Penyelidikan Kanser

KUALA LUMPUR 2 Dis. - Persatuan Insurans Hayat Malaysia (LIAM) menderma RM50,000 kepada Yayasan Inisiatif Penyelidikan Kanser (Carif) sebagai salah satu langkah khidmat masyarakat per-satuan tersebut sempena ulang tahun ke-40 LIAM, baru-baru ini.

Presiden LIAM, Vincent Kwo Shih Kang berkata, selain bantuan kewangan itu, pihaknya juga akan menderma sebanyak 50,000 unit buku berkaitan Pencegahan kanser dalam pelbagai bahasa bagi membantu orang ramai menyedari mengenai bahaya penyakit itu.

"Menerusi buku bertajuk *Be Frank* yang akan diedarkan tidak lama lagi, LIAM berharap dapat memainkan peranan dalam masyarakat dengan memberikan pendidikan mengenai kanser.

"Ini adalah salah satu pendekatan proaktif kami untuk mendekati masyarakat dengan menekankan jenis-jenis kanser utama di negara ini dan langkah-langkah yang patut diambil untuk mengurangkan risiko kanser dalam kehidupan sehari-hari," katanya dalam satu kenyataan di sini hari ini.

Majlis penyerahan derma dan

serahan buku tersebut diadakan baru-baru ini dan turut dihadiri Timbalan Gabenor Bank Negara, Datuk Muhammad Ibrahim dan Ketua Eksekutif Carif, Prof. Dr. Tea Soo Hwang.

Sejak 40 tahun lalu, selain menjadi persatuan insurans terkenal di negara ini, LIAM terus memainkan peranan dalam menyumbang kepada masyarakat melalui penganjuran Hari Insurans Hayat.

Mengulas lanjut, Shih Kang berkata, buku *Be Frank* yang akan diedarkan itu diilhamkan daripada seorang pesakit kanser bernama C. Frank, yang masih bersempangat untuk hidup walaupun sudah disahkan menghidap kanser sejak lebih 20 tahun lalu.

"Melalui buku ini, kami berharap dapat menggalakkan pesakit kanser dan keluarga mereka menjadi seperti Frank, membantu meningkatkan kesedaran mengenai kanser kepada masyarakat.

"Buku ini juga akan membantu masyarakat kita untuk lebih terbuka mengenai kanser dan menghilangkan mitos yang dikaitkan dengan penyakit ini," katanya.